

Sessenta agn "usc ladina"

Al 1. de merz dl 1949 gnìvel fora a Persenon l prum numer de "Nos Ladins" sun iniziativa dl dr. Silvester Erlacher. Da ilò encà à fat nost foliet de gragn varesc dl vers dla profescionalité jornalistica y de prejentazion dl contegnù



L prum numer de "Nos Ladins". Per plu iadesc tla storia dla stampa ladina do chest numer él spo gnù mudé y svilupé inant l dessen dl massif dl Sella, enchin ruvé al ann 1990, can che al é gnu publiché l logo de "La Usc di Ladins", che é for mo atual.

Atualité/1 - "Cösta zaitun sarà publicada na ota al mens por la giont de nostes valades, a fin de conservè le bel lingáz de nüsc vedli da zacan, co e stes i pröms abitants dles Dolomites; nos an belo pordü trepes parores de nüsc vedli y sce ara va enant ensciö, val a perde döt nosc lingáz dai peri y neni. Cösta zaitun a le medemo tomp ince l'entenziún de uní spiritualmenter düc i Ladins, por defene miú i interess de düc i Ladins y fa florí nostes beles valades.

Düc i Ladins co judicheia bones cöstes intenziuns, e envités de mené artìcls, pìci o grans che ai sii, da metter te cösta zaitun, stories dles dliscies, üsanzes, legendes, dla cultura dai ciamps,

pres, bosc, tiers...", chestes fova les prumes lignes dl mensil "Nos Ladins", firmedes con "LA REDAZIUN". L titul tl caput dl foliet fova coretament "Sella - Nos Ladins" con i caraters "Sella" scric pitli y "Nos Ladins" metus te na gran scrittura con funzion prinzipala, sceben che l inom dl foliet soura vigni plata via gniva dé dant da la redazion con "Nos Ladins" - chest, ence tles variantes idiomatiches desferentes (p.ej. Nëus Ladins - dizion gherdeina).

Tla edizion dl prum de merz dl 1957 muda la prezendenza de chestes does definziuns "Sella" y "Nos Ladins", "Sella" giata caraters gragn y dominanc y "Nos Ladins" passa sun l secont scalin, con na

funzion demé plu marginala - plu che auter per ne sferié nia ju dldut l inom che la jent à nuzé per l foliet dal prum dì encà. Con l'edizion prum de setember dl 1961 vegn i doi "titui" metus a la per de grandeza de carater y da chest moment inant se clama spo l semimensil ladin ofizialmenter "Sella Nos Ladins".

Do 24 agn: i problems de jì inant

Tla edizion de "Sella Nos Ladins" de Nanuef dl 1972, l numer 1/XXIV scric l redadour Silvester Erlacher: "Pur intant è chesta l'ultima numera

va inant a plata 7